

Yisu Ddoddomo Bei Dae Mel

1. Marlixlyal Leil Mel Yuesaexl Meixl Ho A (Martaexl Sul 1: 18-25).....	2
2. Yisu Leil Xiu (Luxljia Sul 2: 1-7).....	4
3. Yisu Leil Sixr I (Martaexl Sul 4: 1-11).....	5
4. Jianaxr Zzi Gga Ggie Baxl (Yuehal Sul 2: 1-11).....	7
5. Yisu Nopae Su Leil Ggukor Gger (Martaexl Sul 8: 1-4).....	9
6. Yisu Meixr Cirxiu Guaxr Su Vaervaerpor Leil Visser Su Ddei Leil Ggukor Gger (Martaexl Sul 8: 5-13).....	10
7. Yisu Neir Xix Dae Ca Mel Leil Neir Ggaxr Teixl Gger (Luxljia Sul 8: 26-39).....	12
8. Yisu Mersi Ddei Leil Jia Nor Lol (Martaexl Sul 8: 23-27).....	14
9. Yisu Taba Su Ar Ddei Leil Ggukor Gger (Luxljia Sul 5: 17-26).....	15
10. Yisu Ssormaer No Su Ar Ddei Leil Ggukor Gger (Luxljia Sul 8: 40-56).....	17
11. Yisu Mia Nr Xie Ca Nrnel Leil Ggukor Gger (Martaexl Sul 9: 27-30).....	19
12. Yisu Ca Ngordu Leil Zzor Bbox Lol (Martaexl Sul 14: 13-21).....	20
13. Yisu Neixvi Teixlleil Ssi Dae (Martaexl Sul 14: 22-33).....	22
14. Yisu Ca Cirke Leil No Ggukor Gger (Martaexl Sul 15: 29-31).....	24
15. Yisu Neir Xiex Dae Aniux Ar Ddox Leil Ggukor Gger (Marker Sul 9: 14-29).....	25
16. Vuxrhuagol Zzei Leil Hie No (Martaexl Sul 21: 18-22).....	28
17. Yisu Maermocir Ddei Ssor Ddei Leil Gol Du Xixl Lei Lol (Luxljia Sul 7: 11-17).....	29
18. Yisu Bixlsixldaxl Ajjix Bbeddur Dax Ca Leil No Ggukor Gger (Yuehaxl sul: 5: 1-18)....	30
19. Lasaluxl Si (Yuehal Sul 11: 1-44).....	32
20. Yisu Leil Arsae Seixl Zil Gger Nia Zzibbe (Yuehal Sul 11: 45-53).....	36
21. Yisu Yar Si Nei Gol Du Xixl Lei Bbeix Zaxr (Luxljia Sul 18: 31-34).....	37
22. Yuelyuel Jiax Goxr A, Zzovar Zzor (Luxljia Sul 22: 2-23).....	41
23. Yisu Saercor Worga Ga Leil Arbosobo Dax Ddar Biar (Luxljia Sul 22: 39-46).....	44
24. Yoxrtaexl Su Vaervaerpor Mel Yisu Leil Ddar Biex (Luxljia Sul 22: 66-71).....	47
25. Yisu Leil Sixrzixljiaxl Ddei Leil Diexr Ngexl Gger (Luxljia Sul 23: 26-49).....	49
26. Yisu Leil Giexlhix (Yuehal Sul 19: 31-42).....	53
27. Yisu Gol Du Xixl Lei (Luxljia Sul 24: 1-7).....	55
28. Yisu Yar Dax Mae Dae Su Ca Mel Leil Mia Lol (Yuehal Sul 20: 19-20).....	57
29. Yisu Merhhexr Dax Ddeix (Luxljia Sul 24: 50-51).....	59

1. Marlixlyal Leil Mel Yuesaexl Meixl Ho A

(Martaexl Sul 1: 18-25)



Yisu Zidu leil arsae xiu teixl lei mel jiasibbor biar dae. Yisu yarma Marlixlyal leil mel Yuesaexl meixl ho a. Yaa halae zzi dax naer nr goxr seir, Arbosobo ddei Xiu ddei dder Marlixlyal leil anieux niar lol a; nael Yuesaexl mel ddoddomo eil ddei Arbosobo bei a nr saexl. Yar mel nixmox seir, Arbosobo ddei ddar mel dax bei mae dae su ar ddei a. Yel daxmeix Marlixlyal leil seixlda lol nia-nr-zzir a dder arjjiuljjiu a yar leil nr li bei niazzir.



Yuesaexl eilmel leil xiär doxr dae car, yar yixrmeixka a, Arbosobo ddei tisir ddei yar leil mia lol a bbeix: “Daxlweixl giedae ca Yuesaexl, Marlixlyal anieuxniar a mel Arbosobo ddei

Xiu ddei yar leil niar lol arddeir a. Yel ni yar leil bbeix si lei lalssa, zoxrzixr nr ssa. Yar ssor ar ddox xiu nia. Yar mel cassor-worssor mel zuixl bei a, yaa leil jiuxl teixl lei su ddei nga a. Yel ni yar leil Yisu mi gger nia,” eine bbeix a.

Giedae Yuesaexl yixr zucur a dder Seirpor ddei tisir mel yar leil miardal dae mel sael a bei a; yar ssormaer ddei leil bbeix si lei a. Nael aniux ddox xiu nr teixl lei seir a, yar, yar maerssor dax nr naer.

2. Yisu Leil Xiu

(Luxljia Sul 2: 1-7)



Halcar malmal mel, goxrjia ddei vaervaerpor ddei mel miardal a bbeix, goxrjia gga cirmaex-hanga ca mel armael mermi jjixr a, dezixl jjixr nia. Arseir zzi arddol ddei gga su a mel, zzi arddol ddei gga jjixr a, dezixl jjixr nia, eine bbeix a.

Yuesaexl mel Daxlweixl ddei giedae ca a. Yel yar dder Marlixlyal dax cirgo a, Jialixllixl mermi Naxrsalexl kax gga cirdae a, Yoxrdaxl mermi Boxrlifixlhexr kax gga hherdder Daxlweixl ddei mermi gga ssi ci a. Yaa Boxrlifixlhexr kax gga ssi ci car, Marlixlyal aniux xiu zi ci a, ssor ar ddox xiu beil a. Nael xixl ggie nr zza a, yar dder zzeir bbe gga xixl dae a. Yar mae sser a, aniux ddox leil ba gex du lei a, mur latur ddei gga ji dae a.

Yisu zzizzi a vaer du lei a, cir ni bir cir ni leil olnolddu. Arbosobo nei ca mel lei yar leil yarzi lizoxr.

3. Yisu Leil Sixr I

(Martaexl Sul 4: 1-11)



Arbosobo ddei Xiu ddei Yisu nixmox zzar bbilbbi hher ji dae a, yar leil mipaerbbae gga ssi lol. Yar mipaerbbae gga licei (40) ni hher doxr a lei, azo lei nr zzor. Yel yar meixr zildu a.

Neir zzirmar Sardaxl te halmaex gga Yisu leil sixr i lei a, yar leil nr seir mel bei ssi lol niazzir. Yar Yisu leil bbeix: “Ni Arbosobo ddei ssor nga arddeirnga a, ni legelbbe eil taex leil aba loxr lol ssi lar.” Yisu ddarkoxl a bbeix: “Arbosobo Ddei Sul ber leil vaexr deix dae a bbeix: ‘Ca mel gol dae a mel, zzor labox leil lar koxl dae nr nga. Arbosobo bbeix teixl lei ddar cirqir-hanga leil koxl dae arddeir a.’”

Neir zzirmar te yoxl yar leil hier dae a, darmumu ggie ddeix a, mer woxrke goxrjia maelmaerjjia yar leil dor gger a, yar leil i lol. Neir zzirmar te yoxl Yisu leil bbeix: “Ngo cirza-hanga naxrcixlcixl eilmel maelmaerjjia lei ni leil gger nia, ni leil guaxr lol nia. Eilmel mel, ngo leil jia gger goxr a; yel ngo

Yisu Ddoddomo Bei Dae Mel

arseir leil gger niazzir mel dder arseir leil gger cexr. Ni ngo leil cizixl gger dae a, ngo leil bbeixzae gger arddeirnga a, ngo eilmel maelmaerjjia ni leil gger.”

Yisu ddarkoxl a bbeix: “Arbosobo Ddei Sul ber leil vaexr deix dae a bbeix: ‘Ni ddei Seirpor Arbosobo leil lar bbeixzae gger ddo, yar leil lar visser ddo.’”

Neir zzirmar te yoxl yar leil hier dae a, Yiluxsaler zzi gga ssi a, yar leil Arbosobo ddei xi zzir leil ollele halmaex ngier dae lol a, yar leil bbeix: “Ni Arbosobo ddei Ssor nga arddeirnga a, eilmaex gga tiuxl zei ddo a. Arbosobo Ddei Sul ber leil vaexr deix dae a bbeix: ‘Arbosobo yar ddei tisir mel leil miardal a, ni leil guaxr dae a, yaa leixrhher zze ni leil ddor gex dae var, ni qihher zze legelbbe leil zuax nr dae lol.’” Yisu yar leil ddarkoxl a bbeix: “Arbosobo Ddei Sul ber leil bbeix: ‘Ni ddei Seirpor Arbosobo leil sixr i nr ddo,’” eine bbeix a.

Neir zzirmar Sardaxl te cirza-hanga lei sixr i jjia a dder Yisu dax nr hher, ssi du si a. Tisir mel dder Yisu leil visser lei a.

4. Jianaxr Zzi Gga Ggie Baxl

(Yuehal Sul 2: 1-11)



Eine ar boxl a, Yisu mel Jialixllixl mermi Jianaxr zzi gga ssi ci a. Hal cir ni, halmaex gga ggiebaxlsu ar hhexr zza. Yisu yarma lei halmaex hher dae. Yisu leil nei yar dax mae dae ca mel leil lei qie a, yaa lei seivi mu dae. Ggiebaxlsu hhexr mel puxrto zzibbaer dda jjia a. Yel Yisu yarma dder yar leil bbeix: “Yaa hhexr puxrto zzibbaer nr zza a.”

Yisu ddarkoxl a bbeix: “Ama, ni ngo dax bbeix a azo bei bbeixleir? Ngo ddoddomo bei nixixl ddei mel halae nr ci seir,” eine bbeix a.

Nael Yisu yarma zzael, ca leil visser su mel leil bbeix: “Yar nia leil azo miardal mel, nia dder azo bei,” eine bbeix a.

Ggiebaxlggie halmaex mel, loxga vaervaer qiuxl taex dol dae. Loxga cir taex gga mel ajjix qiuxl sir tur ji ddei. Yisu ca leil visser su mel leil bbeix: “Nia loxga gga ajjix bbilbbi dox ji ssi.” Yel yaa dder ajjix bbilbbi dox ji gger a; loxga qir dax lei ddeix ci a.

Yisu Ddoddomo Bei Dae Mel

Yisu yoxl yaa leil bbeix: “Eilcar nia kexl teixl la a, yaa leil ggie guaxr gger su ddei leil arleixr dda sixr i lol,” eine bbeix a. Yel yaa dder ca hal ddei leil ho mal gger a.

Ca hal ddei dda sixr i ho a, puxrto zzibbaer eilmel arddol lei nr saexl. Nael ajjix kexl su mel puxrto zzibbaer eilmel ajjix bixl teixl lei arddeir a saexl. Gcie guaxr gger su ddei dder mixlyixrsixl ddei leil ae si lei a, yar leil bbeix: “Arseir lei puxrto zzibbaer naxrcixl mel hoba vei teixl lei a, seivi mel dda bbox ho a saelnei puxrto zzibbaer ggiexrtaex mel vei teixl lei, nael ni zzael, puxrto zzibbaer naxrcixl mel eilcar sael vei teixl lei leir,” eine bbeix a.

Yisu ddoddomo eine bei eilboxl mel, yar Arbosobo ddei quexrlixl zza ca mel leil saexl lol beil boxl nga a.

5. Yisu Nopae Su Leil Ggukor Gger


(Martaexl Sul 8: 1-4)



Giedae Yisu worga leil zei lei a, ca cirke a yar dax mae dae. Nopae dae ca ar ddei a, yar xilmeir leil puxr gex dae a bbeix: “Seirpor, ni ngo leil kor lol niazzir arddeirnga a, ngo leil kor lol var.”

Yisu leixrhher ddei cei teixl a yar leil ta ssi a bbeix: “Ngaddo, ni kor a!” Yel ca hal ddei cirleixr dder no-nr-pae, kor a.

6. Yisu Meixr Cirxiu Guaxr Su Vaervaerpor Leil Visser Su Ddei Leil Ggukor Gger (Martaexl Sul 8: 5-13)



Giedae Yisu Jiabaernoxr kax ddei gga ssi ci a, Loxrmar goxrjia su meixr cirxiu guaxr su vaervaerpor ar ddei a yar xilmeir lei a yar leil quuxr a bbeix: “Seirpor, ngo leil visser su ddei taba a, ake yixr dae a yar solzeixl zildu a.”

Yisu bbeix: “Ngo yar leil ggu gger ssi.”

Meixr cirxiu guaxr su vaervaerpor ddei ddarkoxl a bbeix: “Seirpor, ngo, ni leil ngo ake gga ssi lol nr piar. Ni ddar ar qier bbeix lalssa, ngo leil visser su ddei dder kor var a. Hherdder ngo ggaxrne vaervaerpor mel ngo leil miardal sael a; halae ngo, ngo worke meixr mel leil miardal sael a. Ngo ca eil ddei leil ‘ni ssi’ bbeix a, ca eil ddei dder ssi a; ngo ca hal ddei leil ‘ni lei’ bbeix a, ca hal ddei dder lei a. Ngo, ngo leil visser su ddei leil ‘eine bei ssi nia’ bbeix a, yar dder bei ssi a.”

Yisu ddar eilmel noni ho a yarzi murgur a, yar dax mae dae

ca mel leil bbeix: “Ngo nia leil yarzi bbeix gger, yar sael a ngo leil einezeixl ddarzzi su mel, ngo Yirsaexllixl ca mel gga lei zeixleixr lei mia nr goxr. Ngo yoxl nia leil bbeix gger, arddolcar a, ca cirke a, dofa piar a gga nei xifa piar a gga lei a, Yalboxrlahar, Yirsar, Yargel yaa dax cirgo a merhhexr ddei goxr gga zzorci-ddami zzor nia. Nael merhhexr ddei goxr gga ddir mibbe hherdder Yirsaexllixl su ca mel leil zzael doxgoxleixr zalbbaer neixmar ggie ggaxr teixl gger a, yaa ser ddei kexl gex dae a worcixl-worni ae nge nia.” Giedae Yisu meixr cirxiu guaxr su vaervaerpor ddei leil bbeix: “Jjixr ddo a! Ni ngo leil ddarzzi a, ni arsae xiar dae mel arsae nga nia.” Yar leil visser su ddei halcar malmal kor a.

7. Yisu Neir Xix Dae Ca Mel Leil Neir Ggaxr Teixl Gger

(Luxljia Sul 8: 26-39)



Eine ar boxl a, Yisu yar dax mae dae su ca mel leil hier dae a, cuaxr cucx dae a, Jialixllixl neixvi bbe leil gger a, Gelase mermi su ca mel dax ssi ci a. Yisu hieltebor ddeix car, zzi gga neir xix dae capor ar ddei a yar dax lei a. Capor eil ddei mel pia nr veixr hormo nixixl nga a; ake gga lei nr goxr, lixbbaex cili gga hher dae lalnga. Yar Yisu leil mia a dder Yisu xilmeir puxr gex dae a worcixl-worni ae dae a bbeix: “Mu zzir ggie hher dae Arbosobo ddei Ssor Yisu, ngo ni dax azo guaxrzoxr? Ngo ni leil quixr, ngo leil tor goxr nr sol lol!” eine bbeix a.

Neir hal te ca hal ddei leil eine bbeix lol a mel, Yisu neir te leil yar ggecir gga ggaxr teixl lei a nga arddeir a. Neir eil te yar leil hormo boxl xix goxr a; yel ca mel yar leil ge du lei a, qihher leixrhher leil hexsox neixl gex du lei goxr a; nael yar zex te gger a, neir te yoxl yar leil mipaerbbae gga ggaxr mal gger a.

Yisu halae neir te leil nr ggaxr seir, yar leil biex a bbeix: “Ni leil arsae mi?” Yar bbeix: “Ngo leil cir cir mi.” Yar leil eine mi a mel, neir cirke a yar leil xix dae a nga arddeir a. Neir ar te a Yisu leil qiuxr a bbeix, yaa leil “Yarzibbor nr zza suddu gga tor ggaxr zei nr gger,” eine bbeix a.

Jiajia halmaex gga worga leil mel veixr ar cir zzor dae. Neir mel dder Yisu leil qiuxr a, yaa leil veixr ggecir mel gga ddir lol. Yisu dder yaa leil ca hal ddei ggecer gga ggaxr teixl gger a, veixr ggecir mel gga ddir lol a. Yel veixr cir dder lagaxlddur gga beix zei a, Jialixllixl neixvi bbe gga de zei si a, niuxl zil a. Veixrloxl su mel mia a, gexr zildu a dder pa du si a, zzi gga goxr dae ca mel leil nei zzi maelleil kax gga goxr dae ca mel leil bbeix gger ssi a.

Ca mel dder arsaenga a bbe i lei. Yaa Yisu dax lei ci a, neir xix goxr ca hal ddei ggecir gga neir zzu leil ggaxr teixl gger ho a. Yar pia veixr dae a, Yisu qihher ddei dax cux dae a, nixmox zzar lei holcir du lei a mia a dder gexr zildu a. Giedae Gelase mermi zaza-lili ca mel lei yarzisael gexr, yaa Yisu leil qiuxr a, yaa dax nr hher lol. Yel Yisu dder cuaxr jiaxl leil ddeix a, jjixr a. Neir xix goxr ca hal ddei mel Yisu leil qiuxr a, yar leil Yisu dax mae dae lol. Nael Yisu yar leil miardal a bbeix: “Ni ake jjixr a, Arbosobo ni leil bei gger dae mel, ca leil biar gger ssi,” eine bbeix a. Ca hal ddei dder jjixr a, Yisu yar leil arsae lerler bei gger mel, zzi gga ca mel leil biar gger a.

8. Yisu Mersi Ddei Leil Jia Nor Lol

(Martaexl Sul 8: 23-27)




Eine ar boxl a, Yisu mel Jialixllixl neixvi bbe qir leil hher dae a, cassor-worssor mel leil Arbosobo ddei ddar mel mul gger dae.

Yar mul gger teixl ho a, hal cir xixlmei yar dax mae dae su ca mel leil bbeix: “Niul cuaxr zzi dae a, neixvi deixrgoxr hal bbu leil ssi,” eine bbeix a. Yel yaa dder cuaxr leil ddeix a ssi a. Yaa ssi dae car, Yisu yixrmeixljjiu dae a. Ajjix teixlleil mel cirleixr dder mersi yarzi vaer jia du lei a, cuaxr jiaxl gga lei ajjix bbi niazzir dae a; yarzisael gexrddo. Yisu dax mae dae su ca mel Yisu leil ae zucur gger a bbeix: “Seirpor, Seirpor, niul si niazzir dae a!” Yisu dder zucur a, mersi nei ajjix ddei leil hie a, mersi ddei dder jia nor a; ajjix ddei lei le nor a.

Yisu yaa leil bbeix: “Nia halae ngo leil ddar-nr-zzi a ngo?” eine bbeix a. Yaa dder yarzi gexr, yarzi murgur. Yaa zzicarzzi dax bbeix: “Ca eil ddei azo ca a leir? Yar mersi nei ajjix mel leil miardal a mersi nei ajjix mel lei yar ddar no,” eine bbeix a.

9. Yisu Taba Su Ar Ddei Leil Ggukor Gger

(Luxljia Sul 5: 17-26)



Seirpor Arbosobo Yisu leil ddo lol a, yar canosu mel leil ggukor gger. Yel ar ni a, Yisu ca leil mul gger dae car a, ca nrnel sael a goxrzeix ddei sser a, taba dae ca ar ddei leil xi gga bbax dil a Yisu meixsaer qir leil bbax dol gger niazzir, nael xi gga ca miur a, yaa arsae Yisu meixsaer qir leil bbax dol gger xiar nr teixl lei, yel dder xipæbbor ddeix a, ngier zzu caexr pixl a, ca ddei nei goxrzeix ddei cirgo a neixl gex dae a, ca cili gga Yisu meixsaer qir leil piur dol gger a.

Yisu yaa yar leil yarzi ddarzzi mia a dder taba dae ca ddei leil bbeix: “Albor, ni ddei zuixl mel ssoxrsuxl ho a.”

Giedae ca ar mel dder nixmox zzar xiar dae a bbeix: “Ca eil te arseir a leir? Arbosobo lar bbeix ddo ddar mel bbeix bel. Arbosobo larnei ca ddei zuixl mel ssoxrsuxl cexr!”

Yisu yaa azo xiar dae saexl a dder yaa leil bbeix: “Nia

Yisu Ddoddomo Bei Dae Mel

arsaenga a nixmox zzar eine xiar ji dae? Ngo ca leil bbeix: ‘Ni ddei zuixl mel ssoxrsuxl ho a,’ bbeix a bbeix so? Bbeixsael bbeix: ‘Ni ha du la a ssi ddo a’ bbeix a bbeix so? Nael ngo middurbbor ca mel leil zuixl mel ssoxrsuxl cexr nia leil saexl lol nia.’ Yel Yisu dder taba dae ca ddei leil bbeix: “Ngo ni leil miardal, ha du la, ni goxrzeix ddei vei dae a, ake jjixr ddo a.”



Yel ca hal ddei ca mel meixsær qir leil lixlixllix ngier du lei a, yar yixr dae goxrzeix ddei vei dae a, ake ho jjixr ho Arbosobo leil bbeixzae gger.

Ca maelmaerjjia lei yarzi murgur a, Arbosobo leil bbeixzae gger, halae nixmox zzar yarzi gexr a bbeix: “Eilni niul xiar lei xiar nr ci ar mel mia a.”

10. Yisu Ssormaer No Su Ar Ddei Leil Ggukor Gger

(Luxljia Sul 8: 40-56)



Yisu ssi car a, ca yarzisael miur a, yar leil bbex dae. Ca cili gga mel ssormaer eine ar ddei zza. Yar mel cirni-cirni lei ggecirzza, cirleixr lei ceix nr seix ceinir koxl nga a; zzirbae maelmaerjjia naxcirjiuxr dax i ji jjia a lei, yar leil ggukor gger xie ar ddei nr zza. Yar mel Yisu giedae ssi mal a, yar pia qir leil arleixr ta a qie, sirnilni ddei ddux nor a.

Giedae Yisu biex a bbeix: “Arseir ngo leil ta a?” Ca maelmaerjjia lei cexr-nr-ssexl. Birdaexr bbeix: “Seirpor, ni xilmeir giedae lei ca zza, yaa ni leil bbex dae arnar a.”

Nael Yisu bbeix: “Nr nga. Ca hal ddei ngo leil ta car a mel, ngo ddoddomo bei a, yar leil kor lol a. Yel ca ngo leil ta a mel, ngo saexl dae.”

Ssormaer hal ddei kerzi dae nr cexr saexl a dder gexrgexrzizi Yisu xilmeir puxr gex dae a arsaenga a yar leil ta, yar yoxl arsae cirleixr dder kor a ca maelmaerjjia meixsaer qir leil bbeix teixl lei a.

Yisu Ddoddomo Bei Dae Mel

Yisu dder yar leil bbeix: “Allor, ni ngo leil ddarzzi a, ni no ddei dder kor a; zzazza-soso a ssi ddo a!”

(Martaexl Sul 9: 18)



Yisu ddar eilmel biar dae car, Yoxrtaexl su ddei Arbosobo ddei sulzzaggie guaxr su ar ddei lei a, yar leil olddetexl a bbeix: “Ngo ddei ssormaer ddox jiajia nr zza a. Ni yar ggecir ddei leil arleixr ta ssi a yar dder gol du xixl lei var.” Yisu dder yar dax cirgo a ssi a. Yar dax mae dae su ca mel lei ssi a.

Yisu yaa ake ssi ci a, Birdaexr, Yuehal, Yargel nei aniuux ddox yarbbor yarma leil lar yar dax cirgo a ddir lol. Ca maelmaerjjia lei aniuux ddox leil aenge gger doxr dae.

Yisu bbeix: “Nge nr ssa, yar nr si, yar yixrmeixljiu dae arnar.” Aniuux ddox si ho a mel yaa saexl a dder Yisu leil vae. Nael Yisu aniuux ddox leixrhher ddei leil gga gex dae a, ae a bbeix: “Allor, ha du la!” Yar xiu ddei jjixr lei a, yar cirleixr dder ha du lei a. Yel Yisu yaa leil miardal a aniuux ddox leil zzorddu gger lol.

11. Yisu Mia Nr Xie Ca Nrnel Leil Ggukor Gger

(Martaexl Sul 9: 27-30)



Yisu yoxl zeixleixr ssi a, meix nr mia ca nrnel a yar giedae mae dae a worcixl-worni ae dae a bbeix: “Daxlweixl giedae ca, ngua leil arleixr zoxlnixr la!”

Yisu ake ddir ci a, meix nr mia ca hal nrnel dder Yisu dax lei a. Yel Yisu bbeix: “Nia, ngo nia leil ggukor gger var ddarzzizzi?”

Yaa bbeix: “Seirpor, ngua ddarzzi,” eine bbeix a.

Yisu dder yaa meixddur ddei leil ta a bbeix: “Nia ddarzzi a dder nia arsae xiar dae arsae nga lol ddo a!” Yaa ddei meixddur ddei dder mia xie a.

12. Yisu Ca Ngordu Leil Zzor Bbox Lol

(Martaexl Sul 14: 13-21)



Giedae Yisu cuaxr ddei leil ddeix a mipaerbbae gga ssi a. Nael ca cir a yar halmaex ssi a bbejjiur a dder zzi gga ddux a, jjiumo ssi mal a yar dax mae ssi. Yisu cuaxr gga ddux lei a ca seirseil a ar ke leil mia a, yaa leil zoxlnixr a no su ca mel leil ggukor gger.

Hal cir ni mercixl jiur a, yar dax mae dae ca mel yar dax lei a bbeix: “Eilmaex mel mipaerbbae a nga, lae lei lae dae ho a. Ni ca mel leil ssi lol; yaa leil kax mel gga armael ddei armael zzor labox vae lel ssi lol hor.”

Nael Yisu bbeix: “Yaa ssi nr ssa, nia yaa leil zzor labox gger ssi.”

Yaa ddarkoxl a bbeix: “Ngua eilmaex aba ngor pir nei ngol nrnel lar zza naer.”

Yisu bbeix: “Ngo leil vei gel gger la,” eine bbeix a. Yel dder

ca mel leil miardal a silbbarbbæ mel leil cux dae lol a, aba ngor pir nei ngol nrnel vei dae a, merlabbor i dae a, Arbosobo leil nawo. Yoxl aba ddei ngaxl kae a, yar dax mae dae ca mel leil zzi gger; yaa yoxl ca mel leil zzi gger.

Ca maelmaerjjia lei zzor bbox a. Yoxl nirzzei dae mel bellerzzi ceinir taex gga se ji bbi a. Zzor su ca mel ssormaer nei aniox leil nr suax lei, capor lillil a dder ngordu sael zza.

13. Yisu Neixvi Teixlleil Ssi Dae

(Martaexl Sul 14: 22-33)



Eine goxr ho a qie, Yisu dder yar dax mae dae ca mel leil zul a cuaxr ddei leil deix a neixvi hal bbu leil gger zaxr dae lol. Yar nael halmaex hher dae a ca mel leil jjixr lol. Ca mel ssi ho a, yar dder cirmuzil a wordabbor ddeix a, Arbosobo dax ddar biar ssi.

Eilmerxixl ci a lei, yar lar halmaex hher dae; cuaxr jiaxl nael ssi vimir ho a. Si piar pox a dder bolaxl ddaexr du lei a cuaxr ddei lei le ha dae a.

Giedae soxiu-baxlyixl ci a, Yisu mel neixvi teixlleil ssi gel a yar dax mae dae ca mel dax ssi mal. Yel yaa yar leil neixvi teixlleil ssi gel lei ggie mia a qie, nixmox zzar ssurssulssur gexr a dder, “Caxiu lei a” bbaexl, eine ae du lei a.

Nael Yisu jiurjiur-maemae yaa leil bbeix: “Nia nixmox vaervaer arla bei dae lalssa. Ngo a nga. Nia gexr nr ssa!”

eine bbeix a.

Birdaexr bbeix: “Seirpor, yarzi ni nga bbaexl, ngo leil miardal a ajjix teixlleil ni dax halmaex ssi mal lol la.”

Yisu bbeix: “Ni lei ddo a.” Eine bbeix a, Birdaexr dder cuaxr ddei leil zei a, ajjix teixlleil Yisu dax ssi gel. Nael ajjix teixlleil mel mersi yarzisael jia a, yar gexr a. Yar leil dder ddei zei si niazzir dae a, yar ae dae a bbeix: “Seirpor, ngo leil jiuxl la.”

Yisu dder nialngasael leixrhher bbor cei teixl a yar leil gga gex dae a bbeix: “Ngo leil lalal a ddarzzi su eil ddei ni! Arsaenga a ddarzzi gax-nr-zi?” Yar bbeix teixl a, yaa cuaxr ddei leil ddeix a, mersi ddei dder jia nor a.

Yel cuaxr gga ca mel lei Yisu leil cizixl gger dae a bbeixzae gger a bbeix: “Ni yarzi Arbosobo ddei ssor a bbe!” einei bbeix a.

14. Yisu Ca Cirke Leil No Ggukor Gger

(Martaexl Sul 15: 29-31)



Yisu yoxl halmaex lei nr hher; Jialixllixl mermi neixvi qir leil jjixr a. Yar worga leil ddeix a cu x dae. Ca seirseil ar cir a yar dax halmaex lei a. Yaa pirdaexl dae, mia nr xie, noddexr dae, ddar te nr var nei kebal no su ca cirke leil Yisu dax hier mal lei a, yar dder yaa leil ggukor gger a. Ca mel pirdaexl dae mel ssi var, mia nr xie mel mia xie; noddexr dae mel kor, ddar te nr var mel ddar te var eilzzu mia a yarzisael murgur. Yaa dder Yirsaexllixl goxrjia ddei Arbosobo leil bbeixzae gger.

15. Yisu Neir Xiex Dae Aniux Ar Ddox Leil Ggukor Gger

(Marker Sul 9: 14-29)



Yisu kebal yar dax mae dae ca mel dax jjixr ci car, ca seirseil ar ke a yaa leil pex gex dae ggie mia a; halae Arbosobo ddei sulsaelis su ca mel yaa dax zex doxr dae.

Ca mel Yisu leil mia a dder yarzisael murgur a, yar dax beix mal lei a yar leil seirseir dae biex lei. Yisu yaa leil biex a bbeix: “Nia yaa dax azo ar ddei zex suax leir?” Ca mel gga ca ar ddei a Yisu leil ddarkoxl a bbeix: “Sulmulsu, ngo, ngo ddei ssor ddox leil hier si lei a ni dax lei. Yar leil mel ddar te nr var neir ar te xiex dae. Yar arddol ssi ci lei neir te mel yar leil ggiex doxr, zoxl a yar leil zuax guirle gger, yar meir gga lei helvi ddux lei, yar ser ddei lei zilzir kexl gex dae, ggecir ddei lei ggerdodomo eine loxr. Ngo ni dax mae dae ca mel leil qie a, neir te leil ggaxr teixl gger lol goxr a; nael yaa ggaxr teixl gger nr xie.”

Yisu bbeix: “Eil’ær! Nia eilleix ca eil coxr mel Arbosobo leil lei ddar-nr-zzi, ngo nia dax arddolcar hher ci nia leir? Nia leil

Yisu Ddoddomo Bei Dae Mel

arddolcar sser ci nia leir? Aniux ddox leil ngo dax eilmaex gga hier mal lei,” eine bbeix a. Ca hal ddei dder yar ssor ddox leil hier si lei a, neir te mel Yisu leil mia a qie, aniu x ddox leil yarzi larhor caerfo lol a, yar dder middur ddei leil zuaxcixl-zuaxge zuax doxr dae a, meir gga lei helvi ddux lei a.

Yisu aniu x ddox yarbor leil biex a bbeix: “Yar no eil ddei hormo sael argielggur no ho a?”

Yar ddarkoxl a bbeix: “Ye tor seir dder no dae a. Neir te mel yar leil adoxl gga nei ajjix gga lei hormo boxl nei piar ji gger a yar leil bei zil gger niazzir. Seirpor, ni leil quxr, ni arsae bei gger cexr arddeirnga a, ngua leil zoxlnixr la! Ngua leil beijjiu la!”

Yisu yar leil ddarkoxl a bbeix: “Ni arsaenga a bbeix ‘cexr arddeirnga a’ eine bbeix neil? Ddarzzi su ca mel azo lei bei cexr.”

Aniux yarbor ddei worcixl-worni ddarkoxl a bbeix: “Seirpor, ngo ddarzzi, nael ngo ddarzzi nr loxr, ni leil quxr, ngo leil beijjiu la!”

Yisu mel ca cirke beix mal dax lei ggie mia a dder neir hal te leil hie a bbeix: “Ddar te nr var nei nolbbar neir eil te, ngo ni leil miardal, ni yar ggecir ddei leil ddux lei, zeixleixr lei ddir jjixr nr ddo a.” Neir hal te dder worcixl-worni ae dae a, aniu x ddox leil larhorhormo ar boxl caerfo lol a dder ddux lei

a. Aniux ddox mel casima sael a loxr a, ca cirke a dder bbeix:
“Yar si ho a.” Nael Yisu yar leixrhher ddei leil gga dae a yar
dder ngier du lei a.

Yisu xi gga ddir jjixr ho a, ca nr zza car a, yar dax mae dae
ca mel yar leil biex lei a bbeix: “Ngua arsaenga a neir te leil
ggaxr teixl lei nr xie?”

Yisu yaa leil ddarkoxl a bbeix: “Nia neir eilmel leil ggaxr a
mel Arbosobo dax ddar nr biar a mel dder ggaxr teixl lei nr
xie.”

16. Vuxrhuagol Zzei Leil Hie No

(Martaexl Sul 21: 18-22)




Giedae cir nehe, Yesu Yiluxlsaler zzi gga jjixr lei car, yar zzo meixr a. Yar jjumo qir leil vuxrhuagol ar zzei mia a dder, ssi naer a saer zo, nael azo lei zo nr wo, seixlpeixl lar niar dae. Yel dder sixzzei zzei leil bbeix: “Eine zzezze ni cirse-cirsil lei saer niar nr var a!” Eine bbeix a, vuxrhuagol zzei cirleixr a dder hie zuu a.

Yar dax mae dae ca mel mia a, yarzisael murgur a bbeix: “Vuxrhuagol zzei arsaenga a cirleixr a dder hie zuu arddeir a leir?”

Yisu yaa leil ddarkoxl a bbeix: “Ngo nia leil yarzi bbeix gger, nia ngo leil ddarzzi gaxzi arddeirnga a, ngo vuxrhuagol zzei leil bei dae mel nia bei var. Halae yoxl worga eil ga leil bbeix: ‘Ni eilmaex gga ba pixl a neixvi gga piar ji,’ eine bbeix dder eine nga var. Nia Arbosobo dax ddar biar a, azo qiuxr zzorbbeixlei, ddarzzi a mel dder li wo ddo.”

17. Yisu Maermocir Ddei Sstor Ddei Leil Gol Du Xixl Lei Lol

(Luxljia Sul 7: 11-17)




Hormo arleixr nr goxr seir, Yisu dder Naxryi zzi gga ssi a. Yar dax mae dae ca mel nei kebal ca cirke a lei yar dax cirgo a ssi. Yaa zzi gga gielmi ddei dax ssi ci ddo jiur a, ca sima ar ddei bil teixl lei ggie mia a. Ca sima eil ddei mel ssorzil a nga; yarma ddei lei maermocir ar ddei a. Zzi gga ca cirke a lei yarma leil ca sima ho jjiu dae. Yisu maermocir hal ddei leil mia a dder zoxlnixr zildu a, yar leil bbeix: "Nge nr ssa." Yar dder yaa bil dae sixpir ddei leil nixl gex dae a, ca mel dder nor zei lei a. Yisu bbeix: "Caleixlssor, ngo ni leil miardal, ha du la!" Yar dder cuc du lei a; halae ddar te. Yisu yar leil yarma leil jia gger a.

Ca maelmaerjjia lei yarzi gexr a, Arbosobo leil bbeixzae gger a bbeix: "Niul dax xiezi yarzi ddo ddux lei a bbe! Arbosobo yar ddei ca mel leil beijjiu lei a!" Yisu bei dae eilmel dder Yoxrtæxl mermi nei zaza-lili halzzu gga lei biar bei a.

18. Yisu Bixlsixldaxl Ajjix Bbeddur Dax Ca Leil No Ggukor Gger

(Yuehaxl sul: 5: 1-18)



Eine goxr ho a, Yisu mel Yiluxlsaler zzi gga ssi a, Yoxrtaexl mermi su ca mel ddei jiax ar ddei goxr ssi.

Yiluxlsaler zzi gga alddur ar peixl leil mel “Ya” alddur eine ae. Halmaex mel ajjix bbeddur ar bbe zza. Xiboxrlaexr ddar bbeix a mel “Bixlsixldaxl” bbeddur bbeix. Bbeddur qir leil mel gieyi sael a ngor zex zza. Halmaex mel mia nr xie su ca, pirdaexl su ca, taba su ca, cirza-hanga no su ca cirke guir dae. Yaa tisir mel ajjix bbeddur leil ggiex lei car a leil xia dae a, ajjix bbe lo dae car a arseir hoba ajjix bbeddur gga ddir a mel arddolyox no lei kor var.

Capor ar ddei a mel soceiheixl koxl no ho a. Yisu yar halmaex guir dae ggie mia a dder yar hormo nixixl no ho a saexl a, yar leil biex a bbeix: “Ni kor niazzirzzir?”

Yar ddarkoxl a bbeix: “Seirpor, ajjix bbe ha dae car a zzae arseir lei ngo leil ajjix bbe gga dol ji gger su nr zza; ngo zei

niazzir loci a zzæ si ngo xilmeir leil zei jixr ho a.”

Yisu yar leil miardal a bbeix: “Ha du la! Ni ddei goxrzeix ddei
vei dae a ssi ddo a! Ni no ddei kor ho a. Ni zeixleixr zuixl bei
nr ddo a. Nrnga a ni bir halleix leil lei larhor pex dae var,”
eine bbeix a.

Yar halcar dder kor a, yel yar ddei goxrzeix ddei vei dae a ssi
a.

19. Lasaluxl Si

(Yuehal Sul 11: 1-44)



No su capor ar ddei zza, yar leil Lasaluxl mi. Yar mel yardaxl Mardaxl nei Marlixlyal yaa dax cirgo a Boxrdaxlnixr kax gga hher dae. Marlixlyal eil ddei mel hherdder nerxiuxiu ssuvi mel sser a Seirpor Yisu qihher leil dox deix gger, halae yar olce ddei sser a six hie gger su ddei nga a.

Mardaxl nei Marlixlyal yaa nr hieni mel ca leil miardal a Yisu dax ssi lol a bbeix: “Seirpor, ni perniar ca hal ddei no a,” eine bbeix lol. Yisu ddar eilmel bbejjiur ho a dder bbeix: “Lasaluxl ddei no eil ddei mel si nr var. Yar no a mel Arbosobo leil middux lol, halae Arbosobo ddei Sstor leil middux lol arnar a.” Yisu mel yaa so hieni leil perniar. Nael yar Lasaluxl no bbejjiur ho a lei halae zeixleixr yar hher ggie halmaex nr ni hher a.

Yel yar dax mae dae ca mel leil bbeix: “Niul zeixleixr Yoxrtaexl mermi jjixr.” Yar dax mae dae ca mel ddarkoxl a

bbeix: “Hal nr ni sael Yoxrtaexl su ca mel legelbbe vei a ni leil zax zil gger niazzir dae a lei, ni zeixleixr jjixr a ngo?”

Yisu bbeix: “Niul ddei gaxgor-carbeix Lasaluxl mel yixrmeixljiu dae a, ngo yar leil ae zucur ssi nia.” Yar dax mae dae ca mel bbeix: “Seirpor, yar yixrmeixljiu dae arddeirnga a, yar kor du lei var.” Nael Yisu ddei yilsi mel Lasaluxl si ho a bbeix arddeir a. Yar dax mae dae ca mel zzael Lasaluxl yarzi yixrmeixljiu dae lalnga eine zzirdae. Yisu dder yaa leil zzalzzar a biar gger a bbeix: “Lasaluxl mel si ho a. Yar si halcar a ngo yar dax halmaex nr hher dae a mel nia leil yarzi seir. Eine nga a mel nia leil ngo leil ddarzzi dax lol var. Eilcar a niul yar leil i ssi.” Domar yar dax cirgo a Yisu dax mae dae ca mel leil bbeix: “Niul lei sulmulsu dax cirgo a ssi a, si ssi a!”

Yisu Boxrdaxlnixr kax dax lei ci ho a dder, Lasaluxl leil lixbbaex doxlzi gga dol ji li ni loxr ho a saexl a. Mardaxl nei Marlixlyal yaa nimar si a, Yoxrtaexl su ca cirke a yaa leil i lei, yaa leil qux lei.

Mardaxl mel Yisu lei a bbejjiur a dder ddux a yar leil zi ssi. Marlixlyal nael halae ake cu x dae. Mardaxl Yisu leil bbeix: “Seirpor, ni neixrneixr dder eilmaex hher dae arddeirnga a, ngo nimar dder si nr var a. Nael ngo saexl, eilcar ci a lei, ni Arbosobo dax azo qiuxr mel, Arbosobo dder arsae bei lei ni leil gger var.” Yisu yar leil bbeix: “Ni nimar gol du xixl lei var.”

Yisu Ddoddomo Bei Dae Mel

Mardaxl ddarkoxl a bbeix: “Ngo saexl, nixixl maelele ci a si ho ca mel gol du xixl lei car a, yar lei gol du xixl lei var.”

Yisu bbeix: “Ngo mel dder ca leil gol du xixl lei lol su ddei nga a; ca leil arddolcar ci a lei olga zza lol su ddei nga a. Ngo leil ddarzzi su ca mel si ho a bbeixarnar, gol du xixl lei nia. Gol dae seir car a dder ngo leil ddarzzi su ca mel arddolcar ci a lei si nr var. Ni ddar eilmel leil ddarzzizzi?”

Mardaxl bbeix: “Seirpor, ngo ddarzzi, ni mel dder merlabbor cirdae a middurbbor zei lei ca leil jiuxl su ddei nga a; Arbosobo ddei Ssor ddei nga a.”

Mardaxl ddar eilmel bbeix jjia ho a dder ake jjixr a, arjjiuljjiu a yar nimo Marlixlyal leil bbeix: “Sulmulsu ddei lei a; yar ni leil ae dae.” Marlixlyal ddar eilmel noni ho a qie dder nialngasael ha du lei a Yisu dax ssi. Halcar a mel Yisu mel kax gga ddir nr ci seir; yar halae Mardaxl yar leil zi ssi ggie halmaex hher dae seir. Yaa leil qux ssi su Yoxrtaexl su ca mel, yar jiurjiur-maemae ake ddux si a mia a dder, yar dax mae dae. Yaa zzael yar lixbbaex doxlzi dax nge ssi zzirdae.

Marlixlyal Yisu dax lei ci a, yar leil mia a qie dder yar qihher ddei dax puxr gex dae a bbeix: “Seirpor, ni neixrneixr dder eilmaex hher dae arddeirnga a, ngo nimar dder si nr var a.” Yisu mel Marlixlyal nge dae mia nei yar dax cirgo a lei Yoxrtaexl su ca mel lei nge dae mia a, yar xiu ddei dder yarzi zzasol. Yel dder bbeix: “Nia yar leil arddolmaex dol ji dae?”

Yaa ddarkoxl a bbeix: “Seirpor ni i lei lar!” Yisu dder nge dae a. Yoxrtaexl su ca cirmel mel a dder bbeix: “Nia arleixr i, yar ca eil ddei leil einezeixl perniar!” Yoxl cirmel mel a bbeix: “Yar mia nr xie su ca leil lei mia xie lol var mel, yar Lasaluxl leil nr si lol bei nr var zzar?”

Yisu nixmox zzar yoxl yarzi zzasol. Yar dder Lasaluxl ddei lixrbbaex doxlzi ddei dax lei ci a. Ddir ggie halmaex nael legelbbe vaervaermo ar taex guir gex dae. Yisu ca leil miardal a bbeix: “Nia legelbbe taex va kae ssi.”

Lasaluxl yardaxl Mardaxl bbeix: “Seirpor, yar si ho li ni nga a; ggecir ddei lei bbeirne dae a.”

Yisu bbeix: “Ngo ni leil bbeix gger goxr a zzarmar? Ni ddarzzi a mel dder Arbosobo ddoddomo bei ggie mia ddo.”

Yel ca mel dder legelbbe taex va kae gger a. Yisu dder merlabbor i dae a Arbosobo dax ddar biar a bbeix: “Arbbor, ngo ni dax ddar biar goxr mel ni noni ho a, yel ngo ni leil nawo a! Ngo saexl, ni arddolcar lei ngo ni dax ddar biar dae mel leil noni dae, nael ngo ddar eilmel bbeix a mel zaza-lili ngier dae ca mel leil, ni ngo leil miardal si lei a ddarzzi lol niazzir a bbeix arddeir a.” Ddar eilmel bbeix teixl ho a, yar dder worcixl-worni ae dae a bbeix: “Lasaluxl, ddux lei!” Yel Lasaluxl dder ddux lei a; yar qihher leixrhher nei qiaxrmeix leil lei mae ba gex dae. Yel Yisu dder ca mel leil miardal a bbeix: “Yar leil pe kae gger a yar leil ssi lol!”

20. Yisu Leil Arsae Seixl Zil Gger Nia Zzibbe

(Yuehal Sul 11: 45-53)



Marlixlyal leil i lei su Yoxrtaexl su ca cirke a mel, Yisu bei dæ eilmel leil mia a dder yar leil ddarzzi a. Nael cirmel mel a Yoxrtaexl su ca ddei vaervaerpor mel dax ssi a, Yisu bei dae mel yaa leil biar gger. Yel vaervaerpor mel dder arsae bei nia zzibbe. Yaa bbeix: “Ca eil ddei mel ddoddomo cirke bei a; niul arsae bei nia? Yar eilmel sael a bei zei si arddeirnga a mel, ca maelmaerjjia lei yar leil ddarzzi var. Eine nga a mel, Loxrmar su ca mel dder niul mermi ddei su si var, halæ niul ddei cassor-worssor mel leil ssu si var,” eine bbeix a.

Yel Arbosobo leil zi su værzzirpor ddei bbeix: “Ca eil ddei leil niul leil weix a si ssi lol nia. Nrnga a, niul circuxr-lorbba mier leilei,” eine bbeix a. Ddar eilmel mel, yar armael xiar teixl lei nr nga; Arbosobo yar leil Yisu mel Yoxrtaexl su ca mel leil weix a si nia bbeix har zaxr lol arddeir a. Yisu mel Yoxrtaexl su mel leil weix a lar si nr nga nei, yar halæ zzarvul-zzarmae hher dae Arbosobo ddei cassor-worssor maelmaerjjia leil weix a si nia.

Hal cir ni cirdae mel, Yoxrtaexl su ca ddei vaervaerpor mel dder arsae Yisu leil bei zil gger nia zzibbe dae a.

21. Yisu Yar Si Nei Gol Du Xixl Lei Bbeix Zaxr

(Luxljia Sul 18: 31-34)



Yisu yar miardal dae ca hal ceinirmo leil yar dax ae mal lei a yaa leil bbeix: “Nia i dae ddo a! Niul Yiluxlsaler zzi gga ssi a, xiezi mel Arbosobo ddei ssor ddei arsae lerler nga var vaexr dae mel, maelmaerjjia lei nga du a. Ca mel yar leil Yoxrtaexl su nr nga ca mel leixrga gga jia ji gger nia. Ca halmel yar leil vaessi, yar leil bbeix vuxryixr, yar leil zixlvixr pir deix gger nia; yoxl yar leil deil halae seixl zil gger. So ni cir ni yar yoxl gol du xixl lei nia,” eine bbeix a.

Nael Yisu bbeix dae ddar eilmel, yar dax mae dae su ca mel noni wo nr xie. Arbosobo yaa leil nr saexl lol, yel yaa azo yilsa a lei nr saexl.

Yisu ddar eilmel bbeix jjia ho a dder xilmeir ssi dae a, Yiluxlsaler zzi gga ssi a.

(Luxljia Sul 19: 31-34)



Yaa Saercor Worga leil Boxrfaxrcixr kax nei Boxrdaxlnixr kax dax ssi ci jiur a, Yisu dder yar dax mae dae su ca nrnel leil miardal a bbeix: “Nia deixrgoxr kax hal ddei gga ssi a, ddir car, zeixleixr lei ca zzaer nr goxr seir tarlodaexssor ar ddei neixl gex dae ggie mia ddo. Yel nia pe kae a, eilmaex gga si la. Ca mel nia leil arsaenga a tarlodaex ddei leil pe kae gger biex arddeirnga a, nia dder bbeix: ‘Seirpor yar leil sser zoxr,’ eine bbeix nia.”

Yaa nrnel ssi a, yaa pex dae mel hherdder Yisu bbeix dae mel dax ciryoxr a nga. Yaa tarlodaex ddei leil pe kae car, tarlodaex ddei seirpor ddei yaa leil biex a bbeix: “Nia azo bei?”

Yaa ddarkoxl a bbeix: “Seirpor sser zoxr,” eine bbeix a. Yaa dder tarlodaexssor ddei Yisu dax gga mal ci a, armael ddei teixlsibbor pia xiux lixr teixl lei a, tarlodaexssor zzoxrbbeix ddei leil nal gex gger a, Yisu dder zzaer deix a. Yisu ssi dae car, ca mel armael ddei teixlsibbor pia xiux lixr teixl lei a, jjumo zex gga kar dae a, tarlodaex ddei leil jjium gel lol.



Yaa Saercor Worga hal ga leil zei lei dae a, Yiluxlsaler zzi gga ssi ci jiur car, Yisu ddoddomo bei ggie mia goxr su ca maelmaerjjia lei yarzisael ggesse. Yaa worcixl-worni ae dae a, Arbosobo leil bbeixzae gger a bbeix: “Arbosobo yar miardal si lei zzirmar ddei leil seir lol nia! Merhhexr gga hher dae mel dder tolto r a nga nia, halae mu zzir ggie hher dae Arbosobo leil middux lol nia!”

Ca cili gga Yoxrtaexl su ddei vaervaerpor nrnelsael a Yisu leil bbeix: “Sulmulsu, ni, ni dax mae dae su ca mel leil hie a, eine tor nr bbeix lol!”

Yisu ddarkoxl a bbeix: “Ngo nia leil bbeix gger, yaa meir ddei mix gex dae a ddar nr te arddeirnga a, legelbbe eilzzu lei ae du lei var!” eine bbeix a.

Yisu Yiluxlsaler zzi gga ssi ci ddo jiur car, yar zzi ddei leil mia a dder nge dae a bbeix: “Ael-aer! Nia arsae Arbosobo dax

Yisu Ddoddomo Bei Dae Mel

toltor a nga nia nr saexl leir. Nixixl ddei ci a mel, nia leil vuxryixr su ca mel legelbbe nei nilhar sser a, Yiluxlsaler zzi ddei leil zaza-lili cix du lei a, nia leil ge du lei nia. Arbosobo nia leil jiuxl lei car nia nr saexl a, yel nia leil vuxryixr su ca mel dder nia leil nei nia ddei aniu x mel leil bei zil gger nia, xi maelmaerjjia lei caexr pixl gger nia, legelbbe cirtaex-hanga lei caexr zei lei nia,” eine bbeix a.

Giedae Yisu Yiluxlsaler zzi gga ssi ci a, yar cirni-cirni Arbosobo ddei xi zzaexggu gga hher dae a, ca leil mul gger. Yoxrtaexl su ddei vaervaepror mel, Yisu leil seixl zil gger niazzir. Nael cassor-worssor mel Yisu leil lizoxr, Yisu bbeix dae ddar cirqir-hanga lei noni, yel vaervaepror mel arsae Yisu leil seixl nia nr saexl seir.

22. Yuelyuel Jiax Goxr A, Zzovar Zzor

(Luxljia Sul 22: 2-23)



Yuelyuel jiax hal cir ni ci jiur a, Yisu Birdaexr nei Yuehal leil miardal teixl a bbeix: “Nia niul Yuelyuel jiax goxr a zzorddu bei zaxr si la.”

Yaa yar leil biex a bbeix: “Ni ngua leil arddolmaex bei zaxr ssi lol?”

Yisu bbeix: “Nia Yiluxlsaler zzi gga ddir a, capor ar ddei a ajjix ar olbbexr bil dae a, nia xilmeir ssi gel lei nia. Nia dder yar dax mae dae a, yar xi arddol giex gga ddir a mel yar dax ddir dax. Yel ca hal hhexr seirpor ddei leil bbeix: ‘Ngua sulmulsu ni leil bbeix: “Ngo arddol giex gga ngo dax mae dae su ca mel dax cirgo a Yuelyuel jiax goxr a zzor labox mel zzor?’ eine bbeix a, yar dder nia leil lebbor geso har ho xi vaervaermo ar giex i lol var, nia dder hal giex gga bei har zaxr dae ddo a.”

Giedae yaa ssi a. Yaa mia dae mel dder Yisu bbeix dae mel sael a nga a dder Yuelyuel jiax goxr a zzor labox bei har zaxr

Yisu Ddoddomo Bei Dae Mel

ssi a.

Zzovar zzor zi ci a, Yisu nei yar dax miardal dae ca mel dder cirgo a cux dae a. Yisu yaa leil bbeix: “Si ngo leil bei no gger xilmeir leil, nia dax cirgo a Yuelyuel jiax zzorddu zzor a, ngo yarzi ggesse. Ngo nia leil bbeix gger, ngo zeixleixr lei Yuelyuel jiax goxr a zzorddu nr zzor a; hherdder Yuelyuel jiax goxr ddei yils i ddei Arbosobo ddei goxr gga yarzi loxr hane zzezze ci.”

Giedae Yisu dder beizi ddei vei gel lei a Arbosobo leil nawo ho a bbeix: “Nia eil ddei vei dae a, cir ddei ar jjiu dda. Ngo nia leil bbeix gger, ngo zeixleixr lei puxrto zzibbaer eil ddei nr dda a; hherdder Arbosobo ca ddei zzirmar bei lei zzezze ci.”

Yisu yoxl aba ar pir vei du lei a, Arbosobo leil nawo ho a, ngaxl kae a, yaa leil zzi gger a bbeix: “Eil ddei mel ngo ddei ggecir ddei nga a. Ngo ddei ggecir ddei mel nia leil weix a si nia. Nia eil ddei zzor a mel, ngo leil holcir dae nia.” Aba zzor ji ho a, Yisu yoxl xilmeir sael a beizi ddei vei du lei a bbeix: “Eil ddei mel ngo ddei sirnilni a; nia leil weix a ddux, hherdder Arbosobo nia dax bbeix har zaxr dae ddei nga a.

Nia i ddo a; ngo leil vurlelsu ddei ngo dax cirgo a zaezir ddei dax cux dae. Ngo mel, Arbosobo bbeix dae mel sael a si nia, nael ngo leil vurlelsu ca ddei zoxr a!” eine bbeix a. Yisu dax mae dae su ca mel biex a bbeix: “Eine bei su ddei arseir a?”

Yisu ddarkoxl a bbeix: “Ngo aba ddei niuxl lel labox ddei gga niuxl ho a arseir leil gger a mel, hherdder arseir nga a.” Yel Yisu dder aba ddei vei du lei a, niuxl lel labox ddei gga arleixr niuxl a, Jialuxl mermi su Yoxrdaxl leil zzi gger a. Yoxrdaxl aba ddei zzi gel lei a zzor ji a qie, Sardaxl te dder yar leil xix dae a. Yisu yar leil bbeix: “Ni azo bei niazzir dae mel, nialngasael bei ssi ddo a.” Yoxrdaxl dder ddux si a.

(Martaexl Sul 26: 14-16)



Yar dder Yoxrtaexl su ca ddei vaervaerpor mel dax ssi a. Yaa dax arsae Yisu leil yaa leil jia gger zzibbe. Yaa yarzi gges, yel dder Yoxrdaxl leil piu socei taex gger a. Yoxrdaxl ddarkoxl a. Yar dder Yisu leil vaervaerpor mel leil arsae jia gger nia xiар doxr dae a. Yar ca mel nr hher dae car, Yisu leil vaervaerpor mel leil jia gger niazzir dae.

23. Yisu Saercor Worga Ga Leil Arbosobo Dax Ddar Biar

(Luxljia Sul 22: 39-46)



Yisu Yiluxlsaler zzi ddei gga ddux lei a, zoxlzoxl sael a, yar dax mae dae su ca mel dax cirgo a Saercor Worga leil ddeix a. Halmaex ssi ci a, yar yaa leil bbeix: “Nia Arbosobo dax ddar biar a, nia, nia leil sixr i dae mel pex dae car, nia leil zuixl nr bei lol,” eine bbeix a.

Yisu dder yaa dax legelbbe ar taex piar ci ddo sael ar zeixl ssi a, cizixl gger dae a, Arbosobo dax ddar biar a bbeix: “Arbbor, ni bei yuex arddeirnga a, ngo leil yarzisael goxr sol eilmel tor nr goxr lol, nael ni dax zox lalssa, ngo dax zox nr ssa.” Yar Arbosobo dax eine biar dae car, tisir ar ddei lei a, yar leil hhel du lei lol. Yisu cix zildu a, yar Arbosobo dax zabbar a biar doxr, yar ddei giel mel sirmilni ddux lei sael a, middur ddei leil zzeix gex dae a.

Yisu Arbosobo dax ddar biar teixl ho a, ha du lei a, yar dax mae dae su ca mel dax jjixr ci a. Yaa mel yarzi cix a dder, yixrmeixljjiu dae a. Yar dder yaa leil bbeix: “Nia arsaenga a yixrmeixljjiu dae? Ha du la! Arbosobo dax ddar biar a, nia, nia leil sixr i dae mel pex dae car, nia leil zuixl nr bei lol,” eine bbeix a.



Yaa ddar biar dae car malmal, Yisu miardal dae ca ceinirmo gga Yoxrdaxl te mel lei a. Yar dax mel halae altor nei zzargger vei dae a, Yisu leil ssu lei su ca seirseil ar ke ca dae.

Yisu leil vurlelsu Yoxrdaxl te yaa leil Yisu arseir a saexl lol a bbeix: “Ngo arseir leil jiuxl ssi a mel arseir dder Yisu nga a. Nia dder yar leil ssu gex du lei a, hier si ddo a,” eine bbeix a. Yoxrdaxl te dder Yisu dax lei a bbeix: “Sulmulsu” bbaexl ae a yar leil jiuxl ssi. Yesu yar leil bbeix: Yoxrdaxl, ni ca leil jiuxl hoxltexr eil ddei sser a ngo leil vurlel a ngo. Yaa dder Yisu leil ssu gex du lei a. Yisu yaa leil bbeix: “Nia altor nei zzargger vei dae a ngo leil ssu lei a, ngo leil vaervaerpor leil dir su ar ddei i mal gger a ngo? Ngo bbecir-bbeni Arbosobo ddei xi zzaexgu gga ca leil mul gger a, nia dax cirgo a hher dax dae car zzael, nia ngo leil nr ssu. Nael nia eine bei a mel dder, Arbosobo Ddei Sul ber leil ngo arsae lerler nga nia bbeix goxr ddar mel yarzi loxr a,” eine bbeix a. Halcar malmal yar dax mae dae ca maelmaerjjia lei yar dax nr hher, pa du si a.

Yisu Ddoddomo Bei Dae Mel

Giedae Yisu leil ssu lei su ca mel dder Yisu leil Arbosobo leil zi ggie xi zzaexggu gga hier ci a. Yaa Yisu leil bbeix vuxryixr, yar leil deil. Yar meixddur zze leil bbe gex du lei a bbeix: “Ni doxl xiezi a zzarmar? Ngua leil bbeix gger la, ni leil deil su ddei arseir a?” Yaa yoxl ddar cirke bbeix a, yar leil hie vuxryixr.

24. Yoxrtaexl Su Vaervaerpor Mel Yisu Leil Ddar Biex

(Luxljia Sul 22: 66-71)



Giedae merteir a, Yisu leil su su ca mel Yisu leil Yoxrtaexl su ca ddei vaervaerpor mel dax hier mal lei. Vaervaerpor halmel Yisu leil biex a bbeix: “Ngua leil bbeix gger la, ni Arbosobo tiur teixl lei ca leil jiuxl su ddei nga nga?”

Yar ddarkoxl a bbeix: “Ngo nia leil bbeix gger zzorbbeixlei, nia ddarzzi nr var, ngo nia leil ddar biex zzorbbeixlei, nia lei ngo leil ddarkoxl nr var. Nael eine cirdae a mel, ngo mel dder yarzi ddo Arbosobo ddei yo piar a gga cucx dae nia.”

Yaa maelmaerjjia bbeix: “Eine nga a, ni dder Arbosobo ddei Ssor nga a ngo?” Yisu ddarkoxl a bbeix: “Ni bbeix hoxr a!”

Yel yaa dder zzicarzzi dax bbeix: “Zeixleixr lei arseir bbeix ggie noni nr ssa a. Niul yar Arbosobo ddei Ssor a bbeix ggie bbejjiur wo ho a,” eine bbeix a.

Yisu Ddoddomo Bei Dae Mel

(Martaexl Sul 27:3-5)


Yisu leil vurlelsu Yoxrdaxl ddei mel Yisu leil zuixl dixl gger ho
a mia a dder waxlhuixr a. Yel piu socei taex ddei vei dae a,
vaervaerpor mel leil koxl gger a bbeix: “Ngo zuixl nr zza ca
ar ddei leil vurlel a mel, ngo zuixl bei a!”

Yaa yar leil ddarkoxl a bbeix: “Ngua dax guaxr-nr-zoxr, ni
armael oldde leil ddeix lol ddo a!” eine bbeix a.

Yoxrdaxl dder piu mel Arbosobo leil zi ggie xi zzaexggu gga
piar dol gger a, ddux a diux zil a.

25. Yisu Leil Sixrzixljaxl Ddei Leil Diexr Ngexl Gger

(Luxljia Sul 23: 26-49)



Meixr mel dder Yisu leil hier si a, sixrzixljaxl ddei leil diexr ssi. Capor, ssormaer cirke a Yisu dax mae dae. Ssormaer mel yar leil xialil-xialor aenge gger doxr dae.

Meixr mel yoxl ge ji dae ca nrnel leil hier si a, Yisu dax cirgo a sixrzixljaxl leil diexr ngexl gger ssi. Yaa “Olggargex” mi halmaex ssi ci a, meixr mel dder Yisu leil nei ca hal nrnel leil sixrzixljaxl ddei leil diexr ngexl gger a. Cir ddei leil a nael, Yisu yo piar a gga diexr ngexl gger; cir ddei leil a nael, Yisu vael piar a gga diexr ngexl gger. Yisu bbeix: “Merhhexr gga hher dae Arbbor, ngo ni leil quuxr, ni, ngo leil diexrzil gger su ca eilmel leil ssoxrsuxl la. Yaa azo bei dae yaa nr saexl,” eine bbeix a. Halcar malmal meixr mel Yisu ddei pia mel bbe kae gger a niju.



Ca mel halmaex ngier dae a igax dae. Vaervaerpor mel lei Yisu leil vaessi a bbeix: “Yar si leil jiuxl a mel, yar yarzi Arbosobo tiur har dae ca leil jiuxl su ddei nga arddeirnga a, yar leil armael leil jiuxl lol ddo a.”

Meixr mel lei yar leil vaessi, puxrto zzibbaer zeilzei vei a, yar leil dda lol a bbeix: “Ni Yoxrtaexl su ca ddei zzirmar nga arddeirnga a, ni armael leil jiuxl ddo a!”

Yisu leil diexr gex dae sixrzixljiaxl ollele mel barpir ar co diexr gex dae. Hal co leil mel, “Eil Ddei Mel Yoxrtaexl Su Ddei Zzirmar A,” eine vaexr deix dae.


Yisu dax cirgo a diexr gex dae hal nrnel gga ar ddei a Yisu leil bbeix vuxryixr a bbeix: “Ni doxl Arbosobo tiur har dae ca leil jiuxl su ddei a zzarmar? Ni armael leil nei ngua leil jiuxl ddo a!”

Nael kebal hal ddei yar leil hie a bbeix: “Niul leil mel, ciryoxr a zuixl dixl gger a; ni halae Arbosobo leil nr gexr a ngo? Niul nrnel zuixl zza a si mibbe. Yaa niul leil faxr a mel niul nr seir

bei goxr a nga arddeir a. Nael ca eil ddei mel nr seir cir jji lei bei nr goxr.”

Yar dder Yisu leil bbeix: “Ni leil qiuxr, ni, ni ddei goxr gga jjixr a, ngo leil holcir dae la!”

Yisu dder yar leil bbeix: “Ngo ni leil yarzi bbeix gger, ni eilni dder ngo dax cirgo a, ca si ho a yarzi goxr seir ggie halmaex hher dax ssi nia,” eine bbeix a.



Halcar mel siraeldir (12:00) ci a; nael merni taex leil neixmarmar jiul gex dae a, yel cirmaex-hanga lei neixmar jjia a, sadir (3:00) zzezze neixmar ci a. Arbosobo ddei xi gga lavulzzar mae giex gex dae co dder ggaxrsi cirdae a jiasi zzezze nr bbaexrlaexr si mal a. Giedae Yisu dder worcixlworni ae dae a bbeix: “Arbbor, ngo, ngo ddei xiu ddei ni leixrga gga jia ji gger a.” Yar eine bbeix ho a seixl ddei dder ceix a.



Meixr mel mia a dder bbeix: “Ca eil ddei mel nixmox seir gaxzi su ar ddei a!” Halmaex gga hher dae a igax dae su ca mel nael, mia a dder zzasol zildu a, nixmoxzo ddei leil deil dae a jjixr a. Nael Yisu leil saexl su ca maelmaerjjia nei Jialixllixl mermi cirdae a, Yisu dax mae dae ssormaer mel halae vimirmir ggie ngier dae a, i dae.

26. Yisu Leil Giexlhix

(Yuehal Sul 19: 31-42)



Yisu leil sixrzixljaxl leil diexr ngexl gger hal cir ni mel, Yuelyuel jiax goxr a, cirza-hanga lei bei har zaxr nia hal cir ni nga a. Giedae cir ni nael dder yarzi zoxlyoxl wornol nixixl nga a; yel Yoxrtaexl su ca mel ca sima leil wornol nixixl hal cir ni sixrzixljaxl leil zza doxr dae lol nr ddo. Yaa dder Birlado dax qiuxr ssi a, sixrzixljaxl leil diexr ngexl dae ca mel leil qihher ddei deil te gger lol, yaa leil si yoxryixl lol, yel yaa ca sima ddei vei zei lei cexr. Yel meixr mel dder Yisu dax cirgo a sixrzixljaxl leil diexr ngexl dae ca hal nrnel ddei qihher ddei deil te gger a. Nael yaa Yisu dax lei ci a, Yisu si ho a mia a dder yar ddei qihher ddei deil te nr gger a. Nael meixr ar ddei a mel zzi deil a sserddu baex sser a, Yisu xilgiexgiex ddei dax zzir dil gger a, yel cirleixr dder ajjix nei sirnilni pe teixl lei a. Eilmel eine nga a mel dder Arbosobo Ddei Sul ber leil vaexr goxr ddar mel yarzi loxr a. Arbosobo Ddei Sul ber leil bbeix: “Yar ddei hherggar mel cir caex lei deil te gger nr var.” Arbosobo Ddei Sul ber leil yoxl bbeix: “Yaa mel, yaa zzir goxr ca hal ddei leil mia nia,” eine bbeix a.

Yisu Ddoddomo Bei Dae Mel

Giedae Yallixlmartaexl zzi gga su ca Yuesaexl nei Nirgedimur dder Yisu ddei ggecir ddei vei zei lei a, zzir bei teixl lei mae sser a, ba gex du lei a, legelbbe gga ddaexr teixl lei lixrbbaex gga dol ji dae a. Giedae cir ni mel, wornol nixixl cir ni a, miar bei nr ddo, yel hal cir ni cirza-hanga lei bei har zaxr dae nia.

Yisu dax cirgo a lei Jialixllixl mermi su ssormaer mel lei Yuesaexl giedae mae dae a, lixrbbaex ddei leil nei Yisu ggecir ddei arsae dol dae lei mia a. Giedae yaa dder jjixr a, Yisu ggecir ddei leil mei gex labox nerxiuxiu mel bei har zaxr. Yaa Yoxrtaexl su ca mel bei zza wo ddei dax zox dae a, ca si ho a mel, ggecir leil mei labox nerxiuxiumo mei gex nia.

Nael giedae wornol nixixl hal cir ni, yaa Moxrxi Lixlfaxr gga miardal dae mel dax zox dae a, yaa wornol a.

27. Yisu Gol Du Xixl Lei

(Luxljia Sul 24: 1-7)



Xiqiti cir ni jiajia merteir a, ssormaer halmel yaa bei har zaxr dae ggecir leil mei gex labox nerxiuxiu mel vei dae a, lixrbbaex ddei dax lei a. Yaa lixrbbaex doxlzi ddei leil guir gex dae legelbbe taex va kae ho a mia a, dder ddir a. Nael Yisu ddei ggecir ddei leil nr mia.

Yaa halae nixmox ddei sisi-huahuamo zza dae seir, neixleixrsael pia bbobbolbbo veixr dae ca nrnel a yaa dax ngier dae a. Yel yaa gexr zildu a dder qiaxrmeix ddei middur ddei leil puxr gex dae a. Ca hal nrnel dder yaa leil bbeix: “Nia arsaenga a ca sima mel gga ca gol leil zo? Yar eilmalex nr hher dae a; yar gol du xixl lei ho a. Yar Jialixllixl mermi hher dae seir, nia leil bbeix gger goxr ddar mel leil holcir dae nia. Yar bbeix: ‘Ca Ddei Ssor ddei leil mel zuixl zza ca mel leixrga gga jia ji gger nia, sixrzixljiaxl ddei leil diexr gex gger nia, yar so ni cir ni yoxl gol du xixl lei nia,’ eine bbeix goxr a.”

Yaa Yisu ddei ddar mel holcir du lei a. Yel yaa dder cirzahanga eilmel Yisu dax mae dae su ca ceidilmo leil nei kebal ca

Yisu Ddoddomo Bei Dae Mel

mel leil bbeix gger jjixr. Nael Yisu dax mae dae su ca mel yaa
nrbba bbeix dae zzir lalnga a, ddar-nr-zzi.



Birdaexr nei Yuehal nael ha du lei a, lixrbbaex ddei dax beix mal. Yaa beix ci a, olmer dae a, lixrbbaex doxlzi ddei gga arleixr i dil a, zzir bei teixl lei mae cir zex cir zex mel lar zza dae; Yisu ddei ggecir ddei nr zza dae mia a dder jjixr a. Yaa nixmox zzar yarzi murgur.

28. Yisu Yar Dax Mae Dae Ca Mel Leil Mia Lol

(Yuehal Sul 20: 19-20)



Xiqiti cir xixlmei Yisu dax mae dae ca mel cirgo a hher dae. Yaa mel Yoxrtaexl su ca mel leil gexr a, alddur mel zilzir ggabil dae. Yaa ddar bbeix dae a qie, Yisu neixleixrsael yaa agala gga ngier dae a bbeix: “Nia leil zzaso lol nia!”

Yaa caxiu mia a zzirdae a, ssurssulssur gexr zildu a. Yisu bbeix: “Nia arsaenga gexr? Nia arsaenga nixmox zzar ngo gol du xixl lei a ddar-nr-zzi? Nia ngo qihher leixrhher leil arleixr i, nia dder ngo caxiu nr nga saexl a. Nia ngo ggecir ddei leil ta a arleixr i! Xiu ddei mel hherggar nr zza, hoxrneixr lei nr zza; nia arleixr i, ngo mel zza.” Yisu eilmel bbeix ho a dder yaa leil yar ddei qihher leixrhher leil diexr goxr mel i lol. Yaa gge zzae ggese, mur zzae murgur, yaa halae Yisu bbeix dae ddar mel leil ddarzzi nr bel dae seir. Yisu dder yaa leil bbeix: “Nia eilmaex zzorddu zza zza?” Yaa dder ngol kal teixl lei ar pir a yar leil zzi gger a. Yisu yaa meixsaer qir leil zzor ji a.

Yel yaa leil bbeix: “Halleix ngo nia dax cirgo a hher dae seir car, nia leil bbeix gger goxr mel sael a nga: Moxrxi vaexr dae

Yisu Ddoddomo Bei Dae Mel

Lixlfaxr, xiezi vaexr dae sul ber, halae Sipi Sul hal ber leil
vaexr dae mel sael a, ngo leil bbeix dae ddar mel
maelmaerjjia beici nia,” eine bbeix a.

29. Yisu Merhhexr Dax Ddeix

(Luxljia Sul 24: 50-51)



Eine goxr ho a, yaa yoxl Yisu leil biex a bbeix: “Seirpor, ni niul Yoxrtael su ca mel leil Yirsaexllixl goxrjia ddei leil guaxr xixl lol du a nga nga?”

Yisu yaa leil bbeix: “Ngabbor arddolcar, arddol cir ni, arsae bei mel yar lozza; nia saexl nr var. Nael Arbosobo ddei Xiu ddei nia nixmox zzar hher ji dae a mel, nia dder yarzi ddo var, yel nia middurbbor zzarvul-zzarmae ca mel leil ngo arsae lerler bei goxr, azo lerler ddar bbeix goxr mel ca mel leil bbeix gger ssi nia,” eine bbeix a.

Yisu ddar eilmel bbeix jjia a, yar dax mae dae su ca mel halae yar leil i doxr dae seir, yar leil dder merlabbor zi deix si a, zico ar co a yar leil jiul gex dae a, yaa dder yar leil mia nr xie a. Yisu merlabbor ddeix car, yaa halae meix lei nr cix merlabbor i doxr dae a, neixleixrsael dder pia piupiu veixr dae ca nrnel a yaa dax ngier dae a bbeix: “Jialixllixl mermi su ca mel, nia arsaenga a ngier dae a, merlabbor i doxr dae leir? Nia Yisu leil arsae merlabbor zi deix si mia a mel,

Yisu Ddoddomo Bei Dae Mel

arddolcar yar halae arsae jjixr lei nia,” eine bbeix a.

Giedae Yisu dax mae dae su ca mel middurbbor zzarvul-
zzarmae ssi a, Yisu ddei ddar seirseir mel ca leil biar gger
ssi. Yaa ca mel gga ar ddei a biar a bbeix: Yisu jjixr lei car,
yar leil ddarzzi su si ho ca halmel xilmeir gol du xixl lei nia.
Eine nga ho a saelnei niul gol dae seir ca mel zico gga
neixleixrsael yaa dax cirgo a ddeix a, niul dder Yisu dax zzi
ddo a. Niul dder arddolcar ci a lei Yisu dax cirgo a hher dae
a. Yel nia ddar eilmel sser a, zzicarzzi leil qux nia.

Ddar seirseir eilmel nia noni dil a, velver a ddarzzi dae nia.
Nia ddar seirseir eilmel leil velver a ddarzzi doxr dae
arddeirnga a mel, nia leil dder jiuxl wo ho a. Yisu mel niul
ddei zuixl mel leil weix a si, halae giexlhex, so ni cir ni yar
yoxl gol du xixl lei a. Yar mel si ho ca mel gga gol du xixl lei
beil zzir ddei nga a. Arddolcar, Yisu leil ddarzzi su ca mel,
Yisu leil koxl dae a, maelmaerjjia lei gol du xixl lei nia.

Ca cirmel mel a biex a bbeix: “Ca si ho a, gol du xixl lei a mel,
yaa ggecir arsae ar ddei zza?” eine bbeix a. Yar ddarkoxl a
bbeix: “Giexlhex dae ggecir ddei mel, xiaxr var; arddolcar gol
du xixl lei ggecir ddei mel, xiaxr nr var. Giexlhex dae ggecir
ddei mel, seixldaddo, gol du xixl lei ggecir ddei mel,
bbobbolbbo zza. Giexlhex dae ggecir ddei mel, middurbbor
ddei ggecir nga; gol du xixl lei ggecir ddei mel, merlabbor
ddei ggecir nga.

Sirnilni zza hoxrneixr niar dae ggecir ddei mel, Arbosobo

ddei goxr gga ddir wo nr ddo; xiaxr var ggecir ddei mel, xiaxr nr var halmel li wo nr ddo. Yisu leil ddarzzi su si ho ca mel mel gol du xixl lei a, merlabbor ddei ggecir li wo a, zeixleixr lei xiaxr nr var a. Yisu leil ddarzzi su ca maelmaerjjia lei gierbox a, merlabbor ddei ggecir li wo nia. Xiaxr var ggecir mel, arsae bei lei xiaxr nr var loxr nia; si var ggecir mel, arsae bei lei si nr var loxr nia.

Yel ni Yisu leil ddarzzi arddeirnga mel, ni velver a hhel gex doxr dae a, Yisu leil ddarzzi zei si nia. Ni lei saexl, ni Yisu leil weix a, yarzi sulku bei dae miar mel mel baexr a bei nr nga. Yel ni arddolcar lei zabbar-seilseir a Yisu ddei miar bei nia.

Ni Yisu leil ddar-nr-zzi seir arddeirnga mel, ni meir gga “Yisu mel Seirpor a” cexrssexl, halae nixmox zzar Yisu si a Arbosobo yoxl yar leil gol du xixl lei lol eine ddarzzi a mel, ni leil dder jiuxl wo ddo a. Ca mel nixmox zzar Yisu leil ddarzzi a mel dder Arbosobo yar leil zuixl nr zza ca i mal gger a.